

四庫全書

集部

欽定四庫全書

集部

明文海卷三百五十四

詳校官起居注事臣顧宗泰

主事銜臣徐以坤覆勘

總校官庶吉士臣倉聖脉

校對官中書臣范鏊

謄錄監生臣周桐

欽定四庫全書

明文海卷三百五十四

餘姚黃宗羲編

記二十八

遊覽

重游石室記

李承箕

大崖周遭皆山山陰可二十餘步有石室焉東西北闕
上竅如立甕引風氣通日色夏洌而冬溫可布席有餘
非神堅志定者不可居又非愛便捷喜左右趨走承奉

挽華紱坐重裯以塵埃面為香粉據高堂大室勢能使
存者亡殺者生富貴者貧賤憂戚翕聚者發散而薰灼
者之所欲居也而使其勉強於一時其心已馳逐於彼
虎豹豕孰能閑之以衣冠視之以干羽而聽之以管
籥之樂哉往年予讀書大崖每因時一遊焉高林低薄
無行人路望山而行遇石而憩俯泉而飲倚杖而歌或
寄之於長吟或寄之於遊觀或寄之於偃仰或寄之於
徙倚隨其所適嗒然於山水之外從予遊者立卿弟也

今年子卿弟讀書大崖而立卿成進士請告而歸顧子
以未老得閒舉武無塵累者時春暮矣又相與一遊焉
向之高者已為人之棟低者已為人之薪左右前後旁
通多歧路惟巉岩老石煖雲氤氳予之坐痕猶若在也
徽州程氏實山人孫氏亮皆載酒助予兄弟之遊而其
從閒取適之義皆可記也

厓門吊古記

方良永

弘治甲子春二月丙午予出按海北取道新會縣舟次

東亭驛縣官屬謁既予進知縣羅僑語之曰匡山之事
千古痛憤辨香敬吊行與子偕乃具牲帛僦民舟習海行
者以行夜二鼓乘汐出港口前後數十舸齊發風靜波
平予卧舟中不知其為泛海也天未明抵岸予急起盥
櫛啓蓬窻東視匡門甚邇景色濛濛未辨登岸肩輿由
松徑縈紆而進典祠者率其子恩平庠生迎于道左問
之勤王義士伍隆起七世孫也予以松間且去祠伊邇
戒毋喝道少頃至祠下舍輿步入先詣全節次詣大忠

達觀二祠殿宇碑亭考其營建顛末大忠則創于故方
伯陶公自強中祀文天祥陸秀夫張世傑三公兩廡皆
祀同時死節諸臣東廡又特設伍隆起配享之位全節
則創于今僉司徐公朝文特祀慈元楊太后其額與祭
則皆上請于朝得旨俞允者也觀禮畢易便服穿叢薄
間從西上直至山椒轉顧後山蒼翠亭岱如展環視左
右山逶迤盤踞如虎伏龍行當建祠處隆然突起稍前
又突出一阜朝北如拱水遶其勢如彎弓隔岸諸峰層

疊秀麗如畫無巉巖竅穿之態較以形勝此亦足恃而顧不能揀國之亡豈地勢無與于人事抑天命已去非此所能勝歟悄然而退遂從東下尋慈元殿舊址去今所創祠可百步許已鞠為榛莽復謁國母墳墳在舊殿之南稍東牡蠣為垣半已就顏國母即楊太后也夫志不載楊太后塋處而端宗陵寢見于志者已漫不可尋今國母有墳巋然獨存其好事者為之抑中原遺民憫后之節收其遺骸或具衣冠瘞之以示哀思歟時微雨

霏霏馳還具服行禮始就位天色晴朗三獻既畢日已
正中縣官請隨祭大忠予謂祭吉禮非日是所宜行乃約戊
申日五鼓即事予回舟次竚立岸上見水鳥飛鳴上下漁
歌互答于兩涯追思往事盡然傷懷徘徊間典祠者曰前有
竒石可往觀予遂乘小舟徑詣石處躡磴仰觀巨石如
屏前二石如人立頂趾皆巨中約如腰狀屏石有刻已
磨滅不可讀云在舊有大刻元柱國將軍張弘範滅宋
于此近巡按廣平徐公瑁易刻曰宋丞相陸秀夫與張

世傑死事于此今石長字沒矣予竊論弘範宜不足責
宋之執政以國與人如棄遺然恬不知恤非得二公振
起其間天理民彝或幾乎息二三公之名實昭然史冊
間當與日月爭光區區磨崖胡能輕重而必與之較爭
哉典祠者又云昔有磨刀石自海門飛來至今尚在于
令覓之潮沒不可得乃返因與羅尹論厓山事謂當宋
室播遷之時楊后非正位中官三公非顧命大臣皆無
與國休戚存亡之義即使不死亦無敢非之者今其孤

忠大節乃出於尋常之所不料此所以尤使後人追思
景慕不容已也祠有田三頃餘乃知縣丁積割廢寺
遺業所充又山故無虎豹居民素不為盜巡司雖設頻
年無捕獲功近稍不逞者密誘他盜來掠其村然猶畏
不敢肆天既薄莫予獨坐舟中感今念昔屢就枕而不
成寐未五鼓即起與大忠之祭既竣事咸曰自有厓山
之行天日無此晴霽風波無此平安也遂回舟由故道
過昨所觀竒石值潮落趾出牡蠣棲其四旁男婦持器

狀如斧長二寸許爭敲取之又有荷鋤掘取蚌蛤于泥中者鷺從旁爭啄其餘無驚懼態無何入港舟行至覘岡漫書是行所見與所論議者作厓山記行錄似朝文為予易題曰厓門吊古記

遊皖山記

李元陽

皖山在潛山縣世傳漢以皖為南嶽其麓有漢祠壇嘉靖戊戌夏匡廬山前與陳內翰後岡別渡江漫遊遙見三峰挿天遂問路至皖嶽之下登麓五里投三祖寺宿

平旦謁殿禮塔因避雨塔腹僧曰每歲夏仲有龍水洗塔今尚未也予疑其言以為有雨則洗奚必龍乎殆僧神其說耳頃之忽雷電交作予欲趨塔腹避雨僧遽挽袖曰不可觀此景象當是龍來也雨頃翻盆予愀然立廊下候之則見大水從塔腹而出鏜鞳之聲如江濤然頃之頓止驗其流注之地皆雀蝠餘穢起視塔腹纖塵不存矣嘗聞浮屠所在神龍訶護信哉既晴由寺後入石澗觀黃山谷題石中之蹟僧曰往年潦漲一澗怪石

俱被沙埋獨石牛歸然豈有神乎徵諸士人皆曰不誣
遂升高履危仰望三天柱令人悚然起敬中峰之頂其
平如盤自度不能至乃呼曾至者問之有一樵者來曰
盤上有異物十數朱髮人面長喙而肉翅如畫雷公之
狀晴天仰卧頂盤如人曬腹樵者遇之雷電隨至故其
頂莫得而登云予方坐酌錢塘邵公經濟適來蓋赴城
都守取道於此公有雅懷聞予在山因迂途相尋遂握
手更酌秉燭聯詩明日有士人數輩來因道古蹟始末

予曰三祖得道之士聖者也山谷才節之士賢者也其
身在當時寂寥偃蹇而百世之下匪直人師尊之鬼神
亦護之彼漢禪壇壇鞠為灌莽想當時千乘萬騎雜遝
山麓如飛鳥一過耳然則人世之足恃者果安在哉

後湖記

謝杰

湖漢以前未之聞吳赤烏四年鑿青溪洩後湖水寶鼎
二年開城北渠引後湖水入新宮殿名始著尋更練湖
晉元帝肄舟師於此名北湖宋文帝元嘉中名習武湖

後二年黑龍見改玄武湖立廟祠焉孝武大明中大閱
水軍號昆明池或明飲馬塘齊梁以來仍名玄武齊永
明二年車駕幸湖梁太清中侯景引湖水灌臺城陳後
主燕羣臣於湖閱武賦詩唐置放生池宋建青溪閣至
熙寧八年王安石請廢湖為田趙善湘因之增收後湖
田租元大德下鍾山鄉開後湖河道自後惟有一池餘
皆菑畬之所至國朝復開為湖貯黃冊其中在京城直
北太平門外周迴四十里其上名山大川掩映如畫正

東曰鍾山下有太平堤設水洞俗稱蓮花洞中有小
閘以時啓閉蓄洩湖水北有秣陵尉蔣子文廟子文存
日自言骨青當為神後逐盜死于鍾山土人憐而祠之
代著靈響正南曰覆舟山象形也一名真武山時有渡
杯僧不知姓氏常乘木杯渡水往來不測死葬此山山
之南為樂遊苑為臺城城在中阜側據高林下東環平
岡西控石城北帶玄武南擁秦淮青溪梁武帝居之西
南有鷄鳴山宋雷次宗齊竟陵王子良開館錄書之所

今建十廟山有寺寺有寶公塔寶公為齊梁間神僧寶誌孝陵玄宮實據其穴因遷之靈谷而祠有像于鷄鳴塋以金棺銀槨誌趺坐其中不僵也為一比丘營二堵宰亦殊典哉正西有盧龍山本名獅子山晉元帝渡江以比北之盧龍故名高皇帝曾此督開平王破偽漢南為石頭城其山曰馬鞍曰四望北為湖頭塔其山曰直瀆曰大壯觀曰幕府即石灰山開平伏兵處晉王導開府其上大壯本觀名陳宣帝所營帝幸觀大閱武命任

忠陣於湖後並以名其山外有坡山梅花水西北為大江沿江諸山競獻秀麗增湖之勝焉湖有五洲相向中隔十字河疑宋所開洲有郭璞墓璞忤王敦意為所害世皆以為墓在荆山識者疑其非今云在湖中差近之又劉宋於湖得甄邯墓初張永開湖遇古塚塚外一銅斗有柄文帝以訪朝士著作郎何承天曰此名新歲斗三公亡則賜之一在塚外一在塚內王莽時江左惟甄邯為大司徒必邯墓無疑啟塚果復得一斗石銘曰大

司徒甄邯之墓若承天者可謂博物君子矣西北曰舊洲今為黃冊庫西南曰新洲上有大墩即郭璞墓弘治十五年始建庫貯冊其上言新者別於舊也前抱一洲正德七年移廚房於此不令煬近二洲也東洲二號荒洲未建庫也近西小洲號別島視諸洲為勝西南之水獨深而澄所謂黑龍潭洪武間冊貯其中者省直共五萬三千三百九十三本弘治間共六萬七千四百六十八本嘉靖間共六萬五千八百五十九本洪武得戶一

千六十五萬二千七百八十九得口六千五百四十四萬五
千八百一十二弘治得戶九百六十九萬一千五百四
十八得口六千一百四十一萬六千三百七十五嘉靖
得戶九百九十七萬二千二百二十得口六千二百五
十三萬一百九十五田土洪武時計八百八十萬四千
六百二十三頃六十八畝弘治時計四百二十九萬二
千三百一十頃七十五畝嘉靖時計四百三十六萬五
百六十二頃六十畝此國家全盛之民數事產也攷之

往牘若西漢自高祖迄平帝約戶千二百二十三萬三千餘約口五千九百五十九萬四千餘約田八百二十七萬五千三百六十六頃餘東漢自光武迄桓帝約戶千六百七萬九百餘約口五千六萬六千八百五十餘約田六百九十三萬一百二十三頃餘晉平吳之後天下一統戶僅一百四十五萬九千八百餘口僅千一百一十六萬三千八百六十餘隋混一之後戶凡八百九十萬七千餘田凡五千五百八十五萬四千四十餘頃戶未

及兩漢而田遠過之唐自太宗至玄宗戶凡九百六萬九千一百五十餘田凡一千四百三十萬三千八百六十二頃餘宋元豐間田凡四百六十一萬六千五百五十六頃餘大觀初主客戶共二千九十一萬有奇雖以禹平水土周公致太平其時人口止千三百數十萬上下地之定墾者亦止九百一十萬八千二十頃是夏周迄今上下三千載間戶之多莫過於宋之大觀及二千餘萬口之多莫過於嘉靖及六千二百餘萬田之多莫

過於隋及五千五百餘萬所可訝者晉武去東漢無百
年戶頓減什之九唐去隋無百年田頓減五之四弘治
去洪武亦董董百餘年田頓減什之伍晉武猶曰大亂
之後唐號太平隋雖富而田在天地間止有此數不應
頓增至此非唐之減乃隋之增有可疑者宋區宇甚狹
而戶及二千萬皆所未解若國初田八百餘萬頃今遽
止四百餘萬頃非頓加少或豪強兼并侵沒之故耳夫
國家以武取天下初年戶口之盛猶如此視晉之頓減

什九者奚翅天淵乃知三國戰爭其民塗炭曹操攻徐州所過鷄犬不留八十萬衆下江南歸者無幾則他又可知已祖宗之有天下真神武不殺至仁而無敵也哉茲湖蹟之大略可攷者於戲湖於六季為閱武樂遊之所無日不干戈而歌舞一入皇明遂成禁地堤之北湖之東復三法司建焉縉紳非公事無敢一寓目其間矧於治遊兒五洲宛在水中央有同蓬萊方丈惟省臣臺臣部臣五日更直宿湖者抵其所人視之且如登瀛洲

而吾白雲曹執法廷尉諸寮日循堤入署者所在湖山亦輒供吟眺春而碧萼朱英相錯如繡夏而菱荷旖旎十里飄香秋而卿月流光玻瓈千頃冬而瑤華玉筍倒影凌波雖無水嬉紅妝之可娛綽有真水真山之可玩亦仕路一清況也淑問之暇不揣為之辭庶明吾吏之非俗云

遊活溪記

桑悅

予至衡山即以家口浮湘而上自以肩輿山行登回雁

峰上下熊羆嶺以發千古之竒既至祁陽邑之諸士子
來訪告予曰浯溪山靈侯先生久矣不可不一往久陰
忽天開日晴予易古衣冠與諸士子步至溪澗以舟亂
流而渡溪有巨石挿淵高六十餘丈峭崿可愛次山定
居之趾南崖壁立中通大道崖嵌鏡石濶二尺許長減
四之一以水漬之瑩如墨玉近景畢照磨崖碑勒于崖
之西北字畫完好歐陽永叔與王惲云碑打殘缺其完
好者永之再勒今則不知其幾勒矣顏元之名則不刊

也崖北勒宋中興頌趙不息撰趙公碩書名不甚傳石勒古今名人詩錄可成數帙不能悉記予匆匆遊覽畢衆翼予上浯臺凌絕頂觀衆尊尊可容酒數斗亦人為鑿成循山而東為顏元書院西建浯亭浯溪環遶其下僧寺面溪地頗開曠或云即次山故宅予遊覽既倦坐僧寺中堂諸士子設榖核酒數行予揖諸士子而告之曰浯溪素無名以次山名之而顯且自古名賢所過之地則專其地之名如賈長沙柳柳州之類離亂不能爭

劫數莫能壞一代生賢不能數人而多弗究其用名山
大川必有主宰之者夫乃陰杌之使其流落奔走因藉
其言以傳名於後世是山川之神默竊世用賢之柄而
不自知也推而至於以萬世為士者謂非天欲用之以
代言設教於無極者乎有為之朝神不靈有道之世天
在下是以賢無不用而世底雍熙也時無與乎已學不
由乎人諸士子其勉乎哉脩德以建功明道以立言使
浯溪為濂洛以引洙泗之流亦吾儒分內事也其可不

加之意耶同遊者鄉進士曾鼎叔和庠友鄧溥文瀚李
紀大倫楊時熙永和劉廷珊朝貴程榦廷榦王溥汝霖
蔣暉啟暘李昕景曙文鳳天瑞盧益齡天厚譚翔汝鳳
蔣尋首陽理宜牽聯書其名字以詔無窮亦以使後之
人可指其名稽其所成以寓景仰庶茲遊為不負也盍
相與勉之弘治六年十月八日

九真山記

董穀

山在漢沔其最著者曰大別蓋禹跡所及嶠源所窮紀

于虞書人皆知之余之初授漢陽也仰之與龍門砥柱
等以為其必有異者也既見之迺平岡橫亘江漢之潏
猶堵然余每過焉必心羨之曰是猶及見菲衣惡食之
盛德步武于雲根水涯茫乎數千年矣既而侍御朱別
山授余郡志考之又有所謂九真山者寔維一郡之鎮
去縣百里能作雲雨禱輒應余曰安得一往其間乎是
年入夏不雨畝田告災民以雩事白爰吉蠲齋宿以五
月既望乙丑有事于九真舟行暮抵蔡店乘月明肩輿

登陸行過半從者戒虎乃益鳴金吹角持炬報呼以進
又二十餘里至麓夜色微茫樹影叅錯攀援扶掖良久
至絕頂得古祠焉即九仙之殿如郡志所載云者鷄且
鳴假寐以旦俯首四顧群峰羅立迺進典祠之老詢之
曰此為龍衣山此為朝冠山此為走馬山此為黃鷹山
此為陳湖山此為稽功山此為崇陽山此為同山皆瘦
削若雕刻蜿蜒如蛇龍遠若趨拱近若侍衛而九真巍
然居所安而受之蓋體有崇卑則勢因俯仰可以觀物

理得人情矣薄暮祀竣迺下山倒舁之僕夫順行余得
逆觀危崖長壑萬卉盛長草木之氣紛馥著人左右皆
成一色殆類蔚藍之天自空而降碧霞之宮從地而湧
巒光欲滴應接不暇又良久迺即平地行三里許始出
山馬鴻荒之初余不識真宰之意使漢水泛濫經乎九
真之下或九真突屹立乎溪水之上則有夏之后金簡
玉文之書未必不告成于茲山之顛與岫嶠同垂無疑
矣迺今如是泯沒千古茲余是之憾也豈九真之靈不

欲炫露自甘寂寞之鄉抑神禹之偶遺不以漢決於此
將大塊賦形出於無意妍媸好惡自生于人心而水土
者不與也是皆未可知也昔九華晦于漢知于唐雁蕩
晦于唐知于宋又安知九真山也不知于今乎是又未
可知者也三彥士皆曰信因以為九真山記

土橋溪記

熊過

由葛家鋪益北三分里之一折而東降嶺絕田則謝氏
務農堂由堂稍北轉而益東并山行少折西下則土橋

溪在馬溪首受土橋田間諸水其源可望見而指也鍾
祥曾侯至富順之明年為嘉靖丁巳歲計得商筭無十
徵為火祥司空須材亟民困省山之役棄其廬舍相扇
而逃曾侯為之猷念阻於異議侯憂之戚既乃得請於
撫臺民得憩焉侯心始寧僉事謝君謀飲侯相慰勞曰
是先憂而後樂也以十一月朔出拱極門達堂所堂上
為三筵西下丞卜君學官博士殷君為侯翼下為六筵
分兩曹皆東向過位北第一次北一筵僉事黃君又最

北刑部郎中謝君南一筵戶部員外王君次行人范君
主人居其最南獻酬既畢就溪飲焉擁土上源斂其旁
流剝三木黑外而朱中皆為標徽中受盃焉夾岨而坐
注而浮之舟倏而泊惟其所值錄酒者舉以灌夕陽滿
川映為紅流蹤談所及情感各異田燭具舉舉酒相屬
過述無俗念以誦之於是充然自適各得其本真夫士
先志官先事由來尚矣然資深逢源者亦多術焉游習
以時勞逸以節所以廣譬而喻志者詎豈異哉古語曰

聖人化世其解在水故下令欲如流水之源學者亦必成章乃達也然予所聞鄺氏枝水蓋千二百五十二子行天下且半曲溪回澗索絡荒遠僻礙鮮能自通者豈上世濬畝距川之教廢不講耶經所不載如土橋溪至雙橋不半舍入中水東趨蓋朝夕耳輒能達於江由此言之學有頓漸政有久近亦在所資而世莫知省耶有隱君子言此去六七年所俗亦淳朴士多知學學多通志志多大政吾誠指其言悟於水因因以樂水之同情

先卜之也侯屬為記欲際其成而觀焉者蓋侯志也因
遂歌系焉邈彼北風鴻鳴嗷嗷豈不憚遠睠此樂郊民
既勞止恤彼簡書我是用康侯心匪舒退食自公無以
寫憂因是謝人駕言出游自堂徂溪洽比孔時汎舟流
觴昏以為期百爾君子鑒於茲水坎坎洊至匪源伊委
流之既遠潦或污之迨有清源援歸於墟常德習事古
先民是師

太華山記

李攀龍

經曰太華山削成而四方其高五千仞其廣十里蓋指
華中削成而四方者爾四方之外宮之盡華山也自縣
南十里入谷逶迤上二十里抵大雷中雷中一峽裁容
人左右穿受不滿足穿受手如決吻人上出如自井中
者千尺曰千尺峽北不至十步復得一峽百尺人上出
如前峽曰百尺峽則東南行崖徃徃如覆敦出人穿其
穹中行穹中穿如反輪牙也厓絕為橋者二所東北徑
雲臺峰東南得大阪可千尺人從其罅中躡銜上阪窮

為棧五步顧見罅中如一耦之畝新發諸耜矣罅中穿如峽中峽中銜如罅中峽中之繡垂罅中之繡倚皆自汲也棧北得厓徑丈人仄行於穿手在決吻中左右代相受踵二分垂在外足已茹則齧膝也足已吐是以趾任身也北不至十步厓乃東折得路尺許於厓剡中入並厓南行耳如屬垣者二里剡窮復西出厓上行則積穿三丈有厓從北來跋此厓上復高三丈自跋首南行厓如前剡中屬耳甌耳矣三里而近為蒼龍嶺嶺廣尺

有咫長五百丈厓東西深數千仞人莫敢睨視是酈生
所稱搦領須騎行者矣雖今得拾級行哉足欲置之置
先嘗一足于級上置也然後更置一足其所置足猶若
置入石中者猶人人不自顧匍匐進也級窮得厓跋焉
高二丈一隅西北出人從其隅上南一里得厓又盡礫
不可以穿繡自汲也是皆所謂懸度矣不至百步西北
冒大石出厓下西南上二里得松林五樹稱五將軍厓
上者不見稍厓下者不見本從縣中望見松如樹莢也

西一里有大石如百斛困不知何來客於此橫道而處
踰之為穿徑二十所西南百步得巨靈掌在削成東北
方壁上不盡壁五丈許人不得至掌二丈許掌形覆其
拇北引如三尋之戟從縣中望見掌即五指參差出壁
上也又西百步詣削成四方上矣西南望削成四方中
東北望所從上削成道前從東北隅出二十里是鐔于
雲臺峰猶杓之在斗矣削成上四方顧其中汗也上官
在汗中西北玉井在上官前五尺許水出於其上潛於

其下東北淫大坎中凡二十八所北注壁下壁下注道
中一穴北出水從上竅之也四壁之穴各在一搏上官
東南上三里許得明星玉女祠舍神霧稱明星玉女持
玉漿乃祠在大石上大石長十丈許祠前輒拆拆下有
穴穴有石如馬折南五丈塚如盆者五所如臼者一所
水方澹澹也下從祠東南峽中行二里得池二所大如
輪東南行三里望見衛叔卿之博臺在別巔為埒不盡
厓尺中如砥可坐十人厓南北縞纚纚也欲度者先握

縞自懸厓中乃跣厓自汰令就縞不得縞還跣厓自汰
得而後釋所自懸縞也此即秦昭王使人施鉤梯處也
西南上三里許得一峽如括曰天門門西出為棧而銅
柱陘不能尺長二十丈棧窮穿井下三丈竅旁出復西
行為棧而銅柱一池在石室中不可涸也天門旁有
臺如叔卿之臺南望三公山三峰如食前之豆是白帝
之所觴百神也從上望壁下大谿谿肆無景即日中窈
窈爾久之山出其末若鏃矢頃即失之矣是為南峰

南峰前出南壁上東峰出東南隅壁上西峰出西北隅
從下望之五千仞一壁矣攀龍曰余既達削成四方中
不復知天不可升矣余夫善載腐肉朽骨者乎及俯三
峰望中原見黃河從塞外來下窺大壑精氣之所出入
又未嘗不爽然自失也

登堯峰記

劉鳳

記云堯嶺者記堯時水所至也其高踰千仞蓋洪水汨
原東南下卑其勢必滔墊古有所識也予嘗三至乃昭

陽歲冬日自滬瀆水行二十里折從一小嶺曰夏隩迤而登逕石仄若刃屨不能數十武即劇選足所任乃置如此百尋抵石橫道若困積出五尋蘚被之其闕有樹榆緣撞上至其半蹠石斷復攬株构足乃得駐若釋循坂則滑而墮傴僂若隔巖行僅進至巔復牽枳擇石罅徐下貼尤視升倍至稍夷草生茸茸坐而墜者再尋有礪從西南來巨石嶙峋交積若水叻之激勢雷轉而實枯礪礪離置又若累棋礪碎且礪不知其幾何時矣下

視宵深上猶不見其極並礮礪躋橋足曲踊踰磊隗又
踣踞沙中屢蹙乃絕礮去崖如覆鍾甬長不及圍下有
隧倨句轉穿其篆間石若旋蟲竇之不可圍之阻無不
隕也入隙中若雷仰視蒼黑黝不睹踏地無耜廣若布
棧而密傳人乃舉足踰前撲墜石碎不可踐旁忽決若
口吐然得棧廣可尺如畎新伐轉從之且拒巖突振不
能直拓之危度股搖不禁矣厯棧可百武遂曠且夷如
環涂容二轍少憩磐石望所涉迷不復辨本非行道強

與客進遇拾薪者怪何以達也已遵涂至巖曰斜坪石
如板構深壑平視準焉可十丈所前望則窪者為太湖
摧者倚者偃者嶮岬者為湖上諸山其在近則轟如帳
列如牙節或伏而興或拱而立其間隴畝錯焉蓋踰險
阨而得曠夷是遁甲開山圖所云沙土之埒雲陽之墟
可以長生可以隱居者非耶彼得至焉者神廩魄悸孰
敢睨視矣顧能廬是間哉又進崖巉嶮崿不峭崩而齟
齬則甚般甃從其隅不百尋又得一坪曰少坪視斜坪

加狹焉而高出之所見如之加闔顯湖始半出至是愈
茫茫沉沉浩漭矣或云是可以望月之出河圖緯象云
邠之隘上為扶桑日所升宣陸之阻上為吳泉月所登
於此夕焉山靜閒下視蕩無止觀當有異特氣厲高噤
不任納其爽淒日暎之景亦且自快去之可二里所有
臺岨空岷立至者必巨縻縵而升孰汲之哉時道第未
除跋履既竭興猶能一取焉上穹阪隄十尋坼裂如幅
於其坼中拾級上又轉而南至院周壘以石被其岨蜿

蜒而長樹連抱者雲杪者拱者杙者構液者中材者千
章院傳自唐名免水近哀墓得斷碣乃鐫蕭梁年及唐
人詩夫隳燬雖在荒僻非有害於物於人無與也而菑
仍焉人莫蹟於山而蹟於埵是非所及矣昔者有軒清
輝東之齋與西隱者猶之礫礪碑燼矣遺碣與衆草荒
曠沼曰碧玉則澄澄湛焉縱廣不足五尋中污也如釜
旁蓋如簷笠仰焉水淫之雖甚淺遇暎不涸樹冪焉窹
若室宇瑤碧瑟以栗則玉之在璞矣井尤寒沁而甘題

以寶雲深自宋泉可甲乙天下四搏以巨石淪之久不
曠鉉松偃蓋者失向所指院下石甃紆波文若水浸清
痕焉礪入之豈琢礪為崖側陲侈虻蚺雜羸蚌跡隱隱若
洪水方濫岸翼之引可十尋是豈異說哉峰在院左者
妙高雲常衣之霽乃徹崖剡行者耳屬恐抵之反相貫
探前測後自上則與磷謀下則與墜謀餘二十丈許左
入不數武有穴窈窈爾投以石鞫然下有穿人或從穿
入內堂龍多怪石穴穿不可達又旁穿詰屈出不復從

故所下視中如硤磕有聲前復磬折踰一竇石棧欹偏
置之而裏則撥爾而觸置之而外則兀爾不安去之百
武有巖深三筵而上穹然乳下垂若出其爪睥其目作
其鱗奮驤欲從風雨攫其縲纏覆者荔屬成羽簿汨越
幽隩決蕩沉氣又舍而前則迴障鐵倚勢陵崇嵐曠纓
帶之林壑振蕩鋪畜豐植冬無散陽夏無燁炎檉柳松
椶生其陰麓峽峭則帶萑萑芳樛燎資焉五里達於涂
山猶覆原上有峰上橫置石支以三足如釜鬲去之者

則石婦闖焉東嶺曰鴨蹠如鈴甌綴之跟皆碎黝若墨
鳥跡所不及也夫傳所稱高山廣川大藪也地道之徹
於上民神之所依而生之良材者也其記堯水事誠誕
則院何以名且洪荒之跡湮不復睹巔曷以有蝸蟬穴
焉是尤駭視者且山者徹也巖者巖也氣巖而徹是殆
蒸化百物不可名狀者也余觀於天下茲山特小爾然
於吳差顯奠壤東南震澤為巨壑出其前光屑常陰陰
震於怪物登之四望雲霧不知所自出憮然若與精氣

接而山川者薄為風雨矣

明文海卷三百五十四

欽定四庫全書

明文海卷三百五十五

餘姚黃宗羲編

記二十九

遊覽

金溪遊記

王慎中

一畝之宮環堵之室槿陰而牖明畜妻子其中而身與
為處出戶而行前有擊鼓之車而後有連帷之衽驟而
之乎空曠之野寂寞之濱蒼山翠嶺而高起綠波澹蕩

而長浮則為之忽然而喜如出幽室脫縛束耳目為之
加明手足為之改適此何異乎飫梁肉者悅蔬茹之食
酗耐醴者暢清冷之漿其舍醇醲而即疏泊而不得謂
之知味也由其無所得于此徒以迫劫於喧湫磬雜之
甚意煩氣倦急於有所投而自解峙者知其為山逝者
知其為水而豈為有過於已哉嘗試登高丘泛長川見
夫樵夫牧豎畧師估人爭道而捷馳疾榜而擊汰以家
為赴望望然不及如其去山水之不速而恐其或後以

彼觀之則醇醲之可舍固在山水而城郭室家其疏泊而思即者矣物之美惡無常態而有定形山水之為佳而城郭室家之為垢濁亦美惡之大齊也由樵夫牧豎畧師估人觀之則所謂佳與垢濁者舉易方而值處世之偶得放於山水輒自謂絕去喧湫磬雜之患方多其所遊之適以傲乎城郭聚而室家居者之人吾亦未知其美惡之所常也飲漿冷者暫快而非甘嘗蔬食者少蘇而不美其甘美之常固在酒肉也彼驟之而忽喜者

意豁於久煩之餘氣舒於積倦之後喜且未幾厭已生矣何必不為樵夫牧豎畧師估人而何以笑彼之望望凡物之美惡無恒而人情之欣厭有向昧者挈情以徇物中之厭欣變於外之美惡迭欣迭厭而不知自主惟明者為能以情御物物變於外而不足以易其中之所樂樂之取於物者未嘗無所寄而皆其自足於中者之所取則惡者未嘗不美而況於其美然後美惡者卒歸于有恒而皆吾之所御欣且不得而有而何有於厭苟

其無所厭則遇物皆適無之而不喜而奚待於忽然蓋
吾泉州之江自諸山發源而下建瓴而急瀉至於金溪
而始演洋渟潄山起於兩溪高深之景相得草樹互映
雲烟相鮮茲亦山水之勝處也之焉而忽喜者不知其
幾何人而吾獨與黃應初洪舜臣二君往遊而樂焉當
其舉杯相屬唱咏方希而諧笑間作計彼驟之而喜者
亦必有以同乎此而山之盎然而靜止水之沛然而流
行接於吾目著於吾心形器都遺而神情獨遇信有彼

所不能同而吾三人者亦可以目擊而道存而不可以
口說喻也然而其樂可以忘言而其遊不可以無述故
予為記其意如此使世之好遊者知吾三人之遊而能
樂蓋有以御乎物而談山水之美者必出於吾而後為
山水之美常也遊之日為嘉靖戊申八月七日應初名
淑清南安人舜臣名朝選同安人而予晉江遵巖居士
王慎中也

遊鳳凰山記

王慎中

自遼城東行三日出連山隘又一日至鳳凰山去朝鮮境尚百有餘里土人稱為開州其地蒼莽無人之場山勢周環連亘不絕惟南面少缺如人臂合抱而掌未及接者首尾低昂大麓偃伏左右若兩翅東西相望宛如一大山不知其中能寬開空隙也予初以使事未遑登覽春三月廿有二日還過其地遼東都司李君本正以千五百騎行迂適日暮按營於此因與副使錦衣衛武士英三人連轡鼓吹而前皆疊石為城隨山障塞巉巖

崩毀過半其缺處為門石臬缺樞沙土中猶隱約可見
門外稍東西向有水關架石作梁水聲幽幽然出叢薄
間若詐語者入門左折而西高崖絕巘上有土臺隆隆
意時當瞭遠處也右折而東盡溪谷涯際有舍一楹覆
地為椽上無片瓦惟朽餘壁立不知何人所常依息疑
野人射獵時信宿草具也自茲北行皆平曠幾二里許
石級頽殘瓦礫零落若官府廢治又二里許正北山坳
處適與所入門相對皆仄隔重石為關兩旁積石方尺

者千餘若將下墜卻敵者極北南立四顧平帖藏風蓄
氣真天造地設儼然千家城郭四隅松柏彌山荆榛被
道豺狼虎豹麋鹿狐兔之迹交羅其間不可復進徒擁
立流望惆悵興思而已或者以為殆全燕時郡邑又以
為故高麗時城堡又相傳唐太宗征東下其地嘗頓兵
于此是皆不必盡然而亦未必盡不然但其東北與女
直海西之境相接而此山正當其衝故當時立城置守
以控扼之經營締造可謂得矣又孰知今日淒涼荒落

而為過客之悲也嗟夫禹貢職方所載區域變遷更置不知其幾何而始致今日之全盛合一遺踪故迹無處無之得失興亡各由其道是皆不足弔者而暇為荒徼悲哉相與一笑還營書此為記

遊筍江記

王慎中

郡侯程習齋公治泉之八月政既通矣天答之歲而民悅其生公乃得與客遊于筍江之澗夫其浩漾澄涵之水流日夜之不息演洋洄洑放乎大海浮於曲折迤邐

之遠不知其幾百里而空曠寥廓際乎目之所極若在
几席之外膏原漫隰彌望透靡畫什伍而理縱橫巒驤
峰踔迅勢驟形凜乎其不可控臨兩崖而四眺則若逗
若拱徊翔停峙睽留而不去各獻妍態映燭乎玲瓏泓
澈之間而光晶新爽飛散下上媚雲氣而麗烟霏蓋亦
竒矣若夫高帆疾艣出沒于霧濤風浪相啣首尾而離
離漁蓬釣艇謳嬉遞發前唱後和擊楫空明魚沉而鳥
起川虛山蕩於微茫晻霏之中灌木菀柳之駢羅鶴鵠

棲止鳧鷖還集輕簷細栢隨曲成構延旦反復鑿晴波
而漾倒影斯則民事之動因乎山水而公與客得以為
瓌傑詭怪之觀者也至於靚粧袿服會一州之士女沿
隈循澗而不可選紛散互合莫窮其來往之所從文斐
芳荃之纈郁遺履舄而墨袿裳激豪吹之清越哀繫絲
之要眇淋漓顛倒徙倚雜還忘其歧道之所向而忽乎
日之將夕斯則生人之娛感乎物節而公與客又得以
同其歡適嘉洽之意者也公飲酒樂甚顧謂客曰吾所

得以為觀者彼方勞於有所營役而不得休而豈知是之為美而吾獨得之以為遊娛於物即者知以為遊矣徒徇乎耳目之好而甘於漿炙之味而烏知吾之所樂惟我能與之同其意而彼豈誠能同於我哉今日之遊蓋亦云樂矣然而此江常在泛日月之無窮前乎遊此者不知幾何人而聲磨跡滅與水俱逝皆已化為浮漚游沫而不可尋矣不有文字以託於不泯則後之人孰知吾與公等之樂於是也乃舉酒屬予曰子宜圖之

予復於公曰昔叔子峴江山公習池與夫柳惲之具區
蘇子瞻之西湖其光景物象極備一時之美文雅照耀
意氣雄俊既擅絕於當日而流風餘韻於今猶可稱思
至其從吏鄒湛侍兵葛疆以及方外惠勤參寥之徒皆
因以不沒於後世然則客方有託於公而此江雖常在
其名或當由是以顯公顧謬意鄙陋無能之文為足以
圖不泯之盛事豈不過哉言已酒罷公揖客別而予退
為之記

遊清源山記

王慎中

登高望遠攬山水之奇變娛耳目於清曠寥廓之表而
宵然失一世之混濁天下之樂宜無此踰者牛山之遊
美矣而景公以之雪泣沾襟不能自止羊叔子登峴山
以臨漢水至與參佐相語悲咽撫然而罷何情之反也
以景公之愚矇然覽齊國之富恐其一旦忽然去之而
死而不得免其意之卑而晏子笑其不仁宜矣叔子慨
然顧其一時之功愛而難忘慮他日之易泯撫當身之

懼而不足以自慰可謂賢者其當樂而哀以身為累而不得盡悅生之性亦何以異于不仁者之悲嗟乎富貴之君侯功名之卿士窮天下之欲無所不足志滿氣盛其多取於物而備享之以為快何所不得宜其兼得於山水而牛山峴首之勝反以出涕而興嗟彼其念富貴之可懷而傷其不得久有喜功名之甚冀於垂永而患其無聞則雖左山右江履齒萃而俯濤瀾而不能有其樂寧獨不樂而已且為之感慨而哀孰知夫蒼厓翠壁

發舒氣象而凌薄光景亦導憂增戚之物也當其戒具
往遊固以酣乎奢佚之驕羨倦乎勲伐之勞動思取樂
于山水之間以適耳目之娛卒之求須臾之樂而不可
得豈非以其所都者厚與所挾者高起于濡戀矜顧而
然耶富貴功名者之于山水其果不得以兼取也清源
山者泉州之名山也予嘗以暇日往遊於其間好事者
往往撰榼酒躋山之巔就予而飲食之因輒相命為遊
攀援險絕探討幽竊極意所止有從有否不為怯也顧

視其踽踽寂寥崎嶇而盤桓何足以望牛山之儻從峴
首之賓僚然吾未嘗不樂而客之從者未嘗不與吾同
其樂也以吾之早廢于時習於富貴之日淺而頑拙不
適用曾無秋毫之長可以挾而待後欲為濡戀而無所
可懷欲為矜顧而無所可喜而山水之樂卒為吾有吾
雖困於世于物無所多取而獨得之於此彼富貴功名
者於天下之欲窮矣而於天下之樂猶有所憾然則吾
之困非徒不以易千駟之君而烜赫震耀聲烈被於江

漢魁乎為一代之元卿者猶將藐乎其小如卷石寸木之在於茲山也吾之所取其亦不為少歟既以語客復記之如此

遊齊山華蓋洞記

雷達

池陽東南三里許為齊山左田而右湖怪石奇峰幽壑古洞璀璨環列其尤絕者如蒼玉雲梯上清華蓋而華蓋於諸洞為最此登臨之士或苦勞而中疲或落暉以增慨遂至榛莽交衢草萊荒徑而茲洞漸不可識矣予

與少郭每及齊山之勝恨不得一陟覽是夏予假便歸
省牽舟而南泊池陽之渚夢寐蒼翠既已躍然適少郭
偕萬峰胡君來顧喟然曰翠微勝概知子夙抱會可
耶遂相與載俎攜壺步石徑攀藤蘿嶙峋聳光直造窠
阻躡朝天而踰雲門趨上清而下曠怡清風徐至扣石
鼓以浩歌徘徊觴咏則山南之勝且盡而日已西矣予
顧曰華蓋之勝竟不可覩耶有田父進曰洞誠勝然已
數十年無人迹胡子曰是人在耳即令隸從操斧荷鋤

鳴鐘而前悉伐其荆藜之塞途者頃之成路吾三人者
緩步而至則洞口石峙如門其中豁然上圓如蓋下平
如砥可容坐數十人後有小口約三十餘步通山脊即
燕石也乃更洗觴命酌滿引劇談山虛籟靜萬慮消息
胡子嘆曰異哉斯遊吾二人叨蒞于斯輒未暇子以邂
逅維舟率爾開荒窮造亦奇矣夫亦洞之會也子謝曰
有是哉竊聞山水與人其氣本相流通惟氣昏窒而不
暢故有沒溺市井以終身者然無來無去斯為善遊而

山水之或以人興或以人廢或千騎萬從馳騫而不足
或鞠為丘墟長噫千古此固隆替不齊之候非有繫乎
山水之靈不靈也吾輩今日之遊亦水行風萍適然相
遭而洞之開不開我與洞皆不得知無所增益者而又
何嘆也胡子喜而笑曰子其記之

遊天然洞記

田汝成

古之官于其土而善為山水游者若謝靈運柳子厚是
也靈運之為永嘉守于厚永州刺史也守刺史守一州

官尊而政劇而二子灑然脫略恣蕩風情凡州之山稍可取者必涉足而寄目焉又能作為詩文以張大景物使不落莫寰中亦竒矣然而未識二子踪跡之所遺者至于今復有能表章之乎否也方今海內名士善山水游者予所聞則姑蘇都玄敬太末方思道天台蔡巨源是三子者好為山水遊也若饑食渴飲而病就醫也其有聞而求必得之也若獮搜而虞逐也巨源參議貴州貴州山水硤陋鮮可游者而巨源必遊凡一丘一壑苟

不為糞壤者皆涉足而寄目焉又善于大書嘉勒名稱以紀蹤跡庶幾靈運子厚之風者巨源所與民同患者也清平城東三里所謂太極洞又其東七里所謂雲溪洞雲溪大極者皆巨源所為名也挈其間去太極百步所即今所謂天然洞也當其時翳于榛莽狐狸之窟而螻蟻之封不為巨源所甄錄乃今去巨源二十餘年矣風雨滌薄門逕砒然可布几筵較其竒于雲溪太極不啻若華屋層軒之與蓬蓽伍也晦于前而顯于後豈非

數與今夫崑山之玉滄海之珠千載求之尚有遺寶物
之無盡藏也如是然則人君之求賢也招以弓旌聘以
輪壁馬知草澤之下不有懷珍而稿馘者乎何以異此
洞之不得暴白于當時也雖然洞之顯雖後時猶不
落莫于世吾安知此外不復更有遺者終有能表章乎
否也

西內前記

李默

先是太史程子舜敷為予談西內之勝以為非人間所

宜有亟約一往不果者彌時心切惘惘於是季夏十有六日子方休沐祠部王子克新晨興戒子同游亭午弗至移晷乃攜吳子允際陳子約之邀予聯騎取道靈濟宮茶話儀曹陸子選之已先至陸子前驅望西安門舍騎步入至內門聞車駕且出心甚恐急趨過仁壽宮北門又東折而南則斧斤如織稍西為仁壽宮直北隙地初築親蠶壇殿于此用前唐事霍韜議也數步穿壞墉達宮之正殿黝堊綵繪圻墁梓匠百工鱗集執藝以趨

殿東西北上為永壽萬春諸宮翼而前殿凡十一楹二
陛以降正南為門者三題曰仁壽宮門門外西南數十
步築神祇壇方可十步蓋倣周禮王社為之從新制也
直東為帝社坊凡駕臨享特駐此坊東北為無逸殿南
為幽風亭蓋望見馬還訪繕部甘子公望于直廬邀予
輩復自宮故道而出指語予曰此文皇帝潛邸也啓珍
羞宮所藏上御書亭殿題額聳觀久之趣至無逸恭覲
睿皇帝農家忙近體上為序述甚備上又著幽風圖記

並揭亭中遂步出宮之東門南行西望黍菽盈疇田畷
趙常侍者遂導而西古樹幽蟠陰森滿目槐柳多至數
圍者蓋遼時物云前起石橋橋下惟智井二餘皆鞠為
榛莽北行古松間隱隱見岡阜鬱然至則小軒峙其前
又前梵石為九曲黃河軒北石假山也石多削為形肖
剝泐不可識山數疊上松皆偃蹇如天成絕頂列銅池
者六皆貯水池傍多穿孔竇下注洞口洞中為龍勢若
噴吐前為園池龍盤其間駕幸則瀉銅池從孔竇迸落

名曰水晶簾吞以洞龍狀流地中激而上出池龍口復入地注于黃河制特幻巧恨不見其吞吐竟作何狀山上有梳粧樓遺址敗榱尚存舊傳為遼后遊處自橋至此地皆以文磚花乳石雜甃之登覽四顧都城已半在目中而故苑荒丘非復故物相顧愴然遂假息槐陰涼風時來常侍曰是特小山耳坡陀砒砒隱起東南者非兔兒山邪公等豈知之乎予亟欲就之陸子時已憊甚常侍呼酒數行肴核雜進為款數刻乃導出一門循塍

而東過省耕亭亭額卽向所觀御書也南並稻畦可二十畝中有池方廣十餘丈環置桔槔引池灌焉踏者以人聲節之呶啞欸乃大類江南苗芄芄榔比可愛陸子曰是田糞力過矣獲必寡畷有憂色復導自東小門出則湖堤萬柳中也緣堤稍南樹益茂密間無人聲林端望見昭光殿常侍曰此兔兒山也予與吳子又欲趨之諸君皆以迂阻有難色予亦不能獨往稍北行常侍別去時夕陽半落湖心波光閃爍荷葉盡舒花皆紅白二

種望之情神俱澈香不足言葭芙蓉蒼然有異鳥巢其末
時啾唧出蘆葦間白鷺片片香森難即湖東列數亭為
艤舟處亭外為西苑門殿闕參差可歷歷指甘子呼小
舟絕流而東曰予將出是門過西華逸闕右向長安就
司空議事矣予五人者遂北行數十步東望釣魚臺過
曲榭高可尋丈翼以複閣窻皆左右闢左瞰湖右臨內
教場故事端陽節天子臨幸競舟較射以為戲遂步出教
場北行直石橋西橋兩端皆坊東曰金鰲西曰玉螻望

圓殿梳粧樓如在席前又聞橋北有龍鳳丹虎圈諸勝而日暮矣諸君子皆立橋少西予獨與吳子步至橋下臨水沉吟而還王子乃邀予就飲惜薪司內侍某所已乃復蹈西安而出時已昏黑矣是遊本圖搜剔幽竒而王子以日昃至陸子且有倦容多張沮計吳子洎予重為之怏悵致私憾焉予乃秉燭漫書所過為前記邀吳子識之庶有託於將來云爾

望江記

李默

禹鑿既通惟江實長百川故竒觀莫加焉正德乙卯秋
九月予計偕北上初從京口夕濟偃卧蓬底不知江作
何狀嘉靖甲申夏六月予則以駕部主事假滿還朝取
道江陰薄次君山君山者楚春申君墓處也江至此漸
縮風濤駭目不覺呼酒狂叫已乃下毘陵趨京口登金
山絕頂望馬極目千里帆檣井井蔽江上下煙景蒼蒼
鐘聞兩岸極瑰瑋之觀心殊樂之閱九載為歲壬辰時
有宣州之謫秋七月由廣陵西出真州往者常絕江而

渡風帆迅駛如涉清溪是時鼓櫂東指踰六七十里乃
達京口方黑雲垂垂起西北颶且作往來舟楫稀甚予
獨駕輕舸乘流直下雖風力漸柔水波微漾然洪流空
渺間寂無聲始察泛江之險予心殆悲焉薄暮復艤舟
金山登陟如初則日已西墜江光半落烟暝中非復如
曩時景況矣是冬臘月既望發自宣州過太平留眺雷
峰進憩景峰亭上忽見江自南來直走姑熟之西數百
里間縹緲如帶意未厭也晡時再登黃山拊臨馱之石

江勢可辨如坐景峰時其夜漏下十刻馳至采石遂扣
謫仙樓推窗望之不可得乃穿松磴造峨眉亭則江出
肘腋間矣然烟靄蔽虧月湧波心恍不得視左右曰白
如氣光如練者是矣為之決皆引睇者久之又明日至
建業從二三客登雨花臺張筵坐笑風颺颺下衣袂皆
飛彼排石頭而繞鍾陵使英雄鼎峙六合分裂者非此
也邪因相與談興亡之故慷慨行歌衆客皆獻敬而散
雖其濫觴岷汶滂汗三巴走白帝絕洞庭帶彭蠡吾不

知其吐納何似然而江之形勝大都可得而覽矣夫其
感於人也為悲為喜為憂為懼江一也無情而生有情
何也羈窮拂鬱則哀怨易興得意肆志則豪宕橫集此
喪已之同塗而至人之所謂物化者也是知登高眺遠
情由我生山川物色觸中而應故善持情者必反觀焉
吾得吾情於茲江也作望江記

遊鬼巖記

何南金

余耳熟鬼巖之勝最久巖故蒲徼地非懸車百里不得

至戊申嘉平取道江口背莆境西北指桂苑則柯生爾
珍先宿遲予促登巖巖距苑椒洞出巖底洞空透可炬
行十里因張道人鐵柱鬼王其中下巨石封鎮故不可
入出苑右折里許水石清駛莆山率以泉勝其特秀之
石鮮數仞强者茲山香爐了髻諸峰稍成林立斧劈勢
最奇則入谷兩危巘轟空百丈蒼碧崑業望而知其為
異境造巖五里寒門幽壑蟻旋百折始通巖身光紫圓
膩直挿一幅雲母屏冠萬山頂特異他巖堂皇竦傑濶

視孤倚如帝座布帛而空其案也如玉京崇墉而無其
雉也如巨靈植掌而絀其指也如金鷄張翅而坦其腹
也巖已絕竒而飛泉一道灌頂漫腹界巖瀉落則更竒
巖下屋數楹嵌巖凹入棲張君像一龕巖突為部泉落
則噴者擊瓦為珠細者潤簷為溜張君前一石井溜適
承之巖宇虛閤溜入井淙錚皆作鼓鏡音繞室不去巖
前平地僅堪布席低首俯矚來處則一穴陰風一甌白
霧蓬蓬浮浮撲面起怪石盡作青獅蒼兕昂驤戲舞於

洪濤簸蕩中人如排罡風披灑氣十步九折而上覲太
清復為九閣當闕虎豹猛蹲恐唱而怵禁之至此則鈞
天廣亭丹霄絳闕萬象在下而已閩土不雪獨此地高
寒間雪此日劇寒故宜雪不雪而霧陰靄滄翳出沒變
幻踵底頂端儻芒乎其非我有巖即無鬼而谿呀豁閉
室寥峭榮固鬼窟也吹烟吐霧招雨嘯風固鬼候也吾
生之得於沙劫也幾何吾身之得於沙界也幾何幾何
中其為生同之而足奉足及之而目奉又復幾何蟻穴

之漏太陽乎芒鉞之占太虛乎此雖雲鳥過眼肆出送
時到手會心必無放過況走一官於數千里外決其南
畝北窻之見而薦以謫詭魁竒洞駭之觀猶然覲面而
自失之悲乎一沙之富不受而還之大造也我實自貧
矣今人從草澤而躋峨嵋之巔不知踵之高也從郎署
而著惠文之冠則揚揚趾高屐折矣士固有志吾好吾
從乎柯生笑以為當洗竿更酌揖張君而退

建業大內記

黃省曾

攝提格之歲如月八日大司馬喬公奉天子明詔道承
天右門左入太廟門門左右皆樊松竹雜灌門內唐左
右位咸有井井覆以亭入左角門過石梁明庭上須彌
座座凡三重皆可路廟間九簷際皆有網絲中設靈座
面南一位面東三位面西三位皆設靈衣由右入觀寢
室室各有靈牀牀左右懸燈牀前素壁壁前各設方木
椅椅上藉黃褥褥上各設裳衣椅麓設履由舊闈出入
端門又入午門左角門進轉西道臺麓上五鳳城樓是

為兩觀中之左右洪武之鐘鼓在焉鐘下承塞以軌空前之左右皆架瑣子革紙鎧甲樓編繚絲為窻日映其上明麗炫目循城之東經八寶庫古今經籍庫東華門內觀太孫宮東宮宮前多梅宮各有寶座龍牀牀皆五綵雕鏤前階三梁以上凡宮隔以街壺入文華門殿制頗小西觀奉先殿殿亦有靈牀座如太廟寢室以歲時薦享不在是多塵又觀興慶宮宮前除積水幾尺宮內藏衣扇等項箱千餘各繫標牌有彩金龍鳳紅箱七八

座列於中又觀大善殿殿在小城之上由左門入北轉
上至南殿殿有網絲門凡六云聖祖覽讀之所其後有
石假山下通石梁石山鈎闌下山循左而入為望江樓
高際霄漢已不可梯樓後為九五飛龍殿間凡九除多
萱草底宮有天宮壁藏佛龕轉至內花園中有亭亭四
面各有五色琉璃石臺一座可以登遊臺峙玲瓏古石
各五中峻次畀臺之兩涯各函石缸二缸水清燭須眉
園內多梅竹松栢百卉俱足晶瑩特異塵世又觀西宮

戶秩以黑金為之往往用焉宮後有御用廚竈為銅軌所疊宮間五中設沉香寶座兩間門相對門疊虎頭於楔上各有龍牀牀各含小牀可以周回布席牀面朱華格眼或剔地起突雲龍盤鳳宮之前窻皆四斜柱文格眼或龜背羅文疊勝門紐皆絡膝紅金為之左右廂宮凡十四又左右翼十二院院各宮三間左右為房房有壁廂八朱金龍鳳為飾皆左啟傍屋三間為廚咸銅竈廚北有小屋三間廚前石井宮除前又殿五間中有沉

香寶座座端有金椅左右有龍牀出宮是為駿殿鴟吻
簷脊皆駿所成四周為格凡四十壁粘黃綾又經武英
殿至大庖庖之祭器皆木色咸朱凡祭列於紅几几上
咸刊定薦物品位祭則攜几以往由西華門西上門以
出大司馬授簡謹記所述



明文海卷三百五十五

欽定四庫全書

集部

明文海卷三百五十七

詳校官起居注主事臣顧宗泰

主事銜臣徐以坤覆勘

總校官庶吉士臣倉聖脉

校對官中書臣范 鏊

謄錄監生臣周 桐

欽定四庫全書

明文海卷三百五十六

餘姚黃宗義編

記三十

遊覽

遊峩眉山記

胡直

予以乙丑仲春之念六日晨發峩眉縣西城從了寶樓
陟華嚴寺過楚狂接輿隱處漱玉液泉徘徊懷之西上
為中峰牛心二寺為雙飛橋雙飛者以二水從山巔懸

溜百千丈始合流於谷底震盪林木間聲轟如也南為
後牛心寺為孫仙洞寺僧出眎孫思邈丹竈藥爐製甚
古西為白水寺寺後羣峰林林若笋然是夜宿寺閣詰
朝卸去車從乘小籃輿上頂心坡坡漸峭行若躡壁衆
戒下窺余下窺自若也又上為九嶺岡長老坪猢猻梯
咸斗絕又上至峰名初歡喜雪皚皚封崖壑猿鳥盡絕
以為至矣已而歷蛇到退至梅子坡最險雪益塞道不
能以輿乃與從者魚貫縋牽一丁偃僂互管而上一休

一升仰視峰腰咸雪白一色絕頂蒼鬱髣髴倒出漢表
雖自顧疲殆而神從景王不羽欲飛又上至雷動坪坪
上巨木凡幾千章皆金鐵幹被綠髮苔雜冰雪磔格聲
琤琤然中通一徑可七八尺許左右深陷倒視窈黑雲
霧茫茫相逐不知幾千百丈也相傳雷雨居其下一聞
人語鼓吹聲則雷大作過者毛骨洒然非人世矣豈所
謂倒景非耶又上為八十四盤險踰前北上至峰名大
歡喜路始平入天門石石雙峙如門歷七天橋抵光相

寺寺殿皆鐵瓦是為絕頂環顧白雲混漾若身在混沌
視天脚反在下有二鳥名佛見及異鼠咸就人取食若
相識然僧告予曰時暮矣明晨請覩光相予宿至晨起
稍霽衆躍曰光必現矣比予跂崖巔陰霧漸塞靡所覩
見有儒者曰是必不見彼下有放光石當其雲蒸日麗
與石相摩盪為之光光不為異余曰唯唯有禪者曰是
大不然此光出時一切見者於彼光中各見己像甲不
覩乙乙不覩甲若此光者出於雲日則當如水中鏡中

彼此互見乃知是異余曰唯唯於是我眉曹尹進曰某
去年侍訪院王公守巡楊王二公咸值光現各覩厥相
果不互見人譽其所常見而毀其所不常見姑不遠見
即此蜀地若火井油泉皆所自徵若皆以常見毀之豈
不誣哉子思子曰及其至也雖聖人有不知歐陽子曰
聖人治其所可知置其所不可知者是謂之中道余亦
曰唯唯至午有驛騎促余歸下至梅子坡雨如注行者
艱倍前日竟不得覩所謂光相佛燈及雪山瓦屋之奇

下逮黑水龍門咸莫到焉至雙飛橋有僧楚山潛奧洞
十年忽自牛心山後披荆莽間猿行出逆余訊曰山巔
觀光相乎余告以登陟危阻未有睹楚山韞然笑曰公
豈以未陟我眉為安乎彼未嘗安也以未睹光相為少
乎此未嘗少也余又曰唯唯既還雅久之有我眉馬鞍
山僧某者自山五百里踵雅稽首乞余紀遊予憫其勤
為書大畧貽之

桃柳記

吳鼎

宋蘇子瞻守杭日既浚西湖築堤堤樹楊柳世稱蘇堤柳更四百餘載剪伐衰耗可知已今上之十一年侯官王君為錢塘令循行故堤歎曰仁侯之迹也而湮廢至此乎間課民補樹柳若干桃居其半君過之喜曰不足想見東坡公風教耶君既入民部他日薦紳大夫士女過之喜曰是不足想見龍江君風教耶好事者寫為王堤桃柳裛諸賦咏識去思云往余從君觀堤上余請君數所樹籍而藏諸掌故禁後毋樵伐君笑不應今春

余過之屬桃柳盛布而我君溫恭盛德不復可從淒然
感舊頓令人思封植嘉樹以毋忘遺澤邑中父老子弟
孰不如我而奚俟禁制之哉又安知後之人不續樹以
紹君美如君之續樹紹蘇公者耶詩云我躬不閱遑恤
我後言君子患其身無以示民毋憂身後變置其法也
昔者君不我應有以夫有以夫君去之明年為嘉靖十
六年其夏五月己卯朔故民吳鼎記

許泉亭記

許相卿

許泉故郭公泉也石門山人更為之名浙山水勝天下
泉值江迴谷邃處涓涓出傾厓嵌竇中俗遠境絕為尤
勝山人過而樂之亭其右卓錫焉已而喟然歎曰有天
地則有茲山有茲山則有茲泉臨茲泉挹且玩者前公
而往後公而來可十百數耶公專而名之者何尚其志不
於物而托之泉泉由以傳然則非公名泉泉以公名爾
天地之間名可以榮利可以富珍麗之物把玩之可以
怡情交乎吾前日紛如也世固嘗畢力營之忘死趨之

志溺分淪造物者莫之許而有也或有之弗久或久之
得咎猶無許耳況名以傳耶秀自分槁寂淪放世無可
撓吾志者茲泉冽寒孤迴委藏於奧阻荒閒之區用可
資於世莫便於用也秀適遭之冷然而軒沸然而淪暢
然而飲啗焉樂以終老人莫吾競造物者莫吾禁也公
去我來泉將不許我乎故更之曰許泉持以告予予憮
然莞爾曰有是哉山人以正德十有四年八月九日亭
予以嘉靖元年正月三日記

顏溪記 吳昌

杭故洲也東塘西堰而中城焉所謂左江右湖者也湖清甚無巨魚宴嬉之舟歲費千金然以其麗也非特杭人日噪焉天下知名久矣東瀕江淤壤數十里每潮汐之候雖大旱土倏津潤用是宜農圃蔬菰尤良諺曰東萊西水明非他方所及然以其樸也若顏溪者非特不遠聞杭人亦罕造焉出艮山門迤東七里為顏溪或云顏氏嘗主之故名或云顏鹽也溪經斤鹵若沙田云爾

溪稍南即沙田東北指赭山赭山海門也潮汐出焉今
司寇胡公別業溪上依水竹結廬面田築塲不垣不斷
胄子子忠未入成均時恒遊息焉樂之自號顏溪主人
是溪之味不甘於西湖瑩徹又不如湖載糞壤鳴桔槔
飲牛浴蠶不雅於畫舫金壘而鼓吹也黃茅苦筍榛莽
彌岸非若蘇堤之柳闕二字之荷蓬戶草堂話桑麻憂雨暘督
稼觀穫而聽耕田之歌又非若漱玉泉汲龍井聆水樂
紺宇在前雲樓映後而放鶴觀魚其間也沿濯斯溪皆

黥面塗足之夫鄉音刺刺不入耳豈如湖上麗人簧言
玉貌而羅綺金珠者乎之數者明知其不如而避彼擇
此蓋佚則淫勞則好善其擇之審矣於是見司寇公恭
儉之風子忠保家令德胥可為法記之

表泰山之巔碑記

万恭

隆慶壬申春黃河泛溢輸道梗湮天子憂皇命恭若曰
汝其治水踰夏河成灌輸悉盡天子懌豫命恭若曰汝
其東封於是臣恭以八月禋泰山報成績也余乃歷嶢

巖踰險絕撫秦碑登日觀已乃陟山巔謁天宮忽緇衣
蹠蹠目瞪足踐招余言曰是泰山巔石也余異之眎其
上室如錮也視其下砌如砥也而惡知夫泰山之巔而
又惡知夫泰山之巔之石余喟然歎曰夫泰山擅四嶽
之尊而茲巔石又擅泰山之尊乃從而屋之又從而夷
之又從而踐履之令尊貴不揚廢靈異不表見余過也
亟命濟倅王之綱撤太清宮徙於後方命之曰第掘地
而出巔母利方母毀圓母斲天成返泰山之真已矣倅

乃撤土嶺出之巔石博十有一尺厚十四尺有奇聳三尺戴活石焉東博二尺五寸厚一尺三寸西博一尺八寸長八尺有五寸夫約泰山而束之巔已奇甚矣又摩頂而戴之石斯上界之絕巔青帝之玄冠也余倚活石覽觀萬里俯仰八荒遠矚則扶桑之日曜其東崑崙之風吹其西近眺則秦碣石若正笏叢石如羣圭而齊魯諸阜圓者似金直者似木曲者似水銳者似火方者似土枕青陽之絳闕俯元君之幽宮而六極之大觀備矣

彼巔石不表見幾千萬年矣今出之始返泰山之真而
全其尊後來覽觀者尚母利母毀母斲其天成務萬世
令返其真而全其尊以母得罪於泰山之神其緇衣踣
躑意乎余問緇衣何許人何所受而告余默而不答噫
我知之矣蓋緇衣受之碧霞碧霞受之泰君泰君受之
上清上清受之元始元始受之寥冥之祖

閱外城記

王樵

萬曆二十一年十一月二十一日同內外守備叅贊部

臣閱外城予以攝工部事出太平門尚書徐公以攝兵部事出神策門予以五鼓盡至觀音門官廳俄而守備邢太監秦寧陳侯相繼至既而尚書徐公至黎明循垣內東行垣皆國初蒸土所築極堅厚上以蜈蚣木出檐覆之以瓦歲久土有剝落木瓦有頽壞則修之至今垂三百年外郭周百八十里包羅山谷誠前代所未有也北面一帶因山為險據江為守自觀音門而東繞鍾山之後而左皆岡阜不斷在東北曰姚坊門又南曰仙鶴

門又南曰麒麟門地勢漸平鍾山側看成峰橫看成嶺
攝山後峙青龍左繞石城右踞天印為案於此行頗得
其形勢之的而知我聖祖於金陵定鼎於鍾山卜吉以
為萬年之歲聖鑒高遠非尋常可窺也是日由南出者
為協同守備劉監丞定西蔣侯起鳳臺門又東曰夾岡
門又東曰上方門又東曰高橋門南北兩路同會於滄
波門有官廳曰閱城會所內外守備兵工二部堂序坐
飯畢予與徐公入朝陽門道中審見鍾山蜿蜒扶輿衆

山環拱南面空濶秦淮流於前大江繞於後沿江諸山
又皆遙為金陵拱護其面勢與尋常所見不同蓋從高
而下始得之也歸至工部與四司官議修城事頗言修
內城易修外城難內城縱有崩壞舊甃多存用甃灰補
修新舊即成一片勢自堅久外城原以土築土有剝落
用土坯幫砌不久即壞後易以甃土外幫甃雖可暫支
一時而甃土原不相入尋亦崩壞若欲永久不壞須如
北京外城一如甃城之法裏雖用土築外則用甃實砌

非幫砌之比故得堅久但北京外城止南三門一面南
京外城則連亘遼濶其功實難周書畢命曰申畫郊畿
慎固封守周禮大司徒乃建王國制其畿方千里而封
樹之有掌固司險掌疆封人之官掌修城郭溝池樹渠
之固頒其士庶及其衆庶之守郭即今之外城所謂溝
池樹渠之固恐大畧如今邊牆之制有牆以限隔有墩
臺以瞭望拒守有渠以環之有樹以固之牆之比城易
修而亦足以為守比城易修者以用土築而不用甃也

欲其足以為守須備前所云四者而後可以經久則在
當事者以意損益而已

閱內城記

王樵

是月二十五日閱內城內外四守備兵工兩部堂會於
通濟門黎明登城如前分閱劉監丞蔣定西由西歷聚
寶門三山門石城門清江門定淮門儀鳳門予等由東
歷正陽門朝陽門太平門神策門金川門鍾阜門而會
於淨海寺寺在城外據獅子山趾獅子山在城內即國

初建閱江樓處是日頗盡金陵大觀蓋內外遠近畢見也通濟之外秦淮之池雉堞不甚高徑不甚濶僅容兩馬俯視甚峻而基實弘濶甌甑兩面厚可丈餘而附墉之士則長坂天成濶十餘丈雖不設臺亦無慮也至正陽門下輿而過旭日初上朝煙未消南望郊壇北望大內如在圖畫自朝陽門而北則鍾山在外隆廣山在內城貫二山之間包山而過孝陵中松柏參天豁谷逶迤歷歷可數隆廣山蓋鍾山之足隴石崔嵬亦多古木有

巡山官軍跪迎山上道中見松栢枝幹多作虬龍之勢
皮似鱗甲在動植二物中恐亦得氣之相類者歟城隨
山勢此處獨高歷級而上東北折處為孝陵後門自此
而西至太平門城皆在岡隴之上太平門居隆廣覆舟
二山之間門外長堤數里為三法司面城臨湖而在鍾
山之趾玄武湖在覆舟山之後城亦包山而過自此至
雞籠山岡隴不斷城皆因山而臨湖湖逼山趾城與湖
相逶迤蓋至雞籠山之盡城不復西別築城下循湖而

北為神策金川二門蓋至此始為城之極北處也城降於雞籠之後者一等有便門歷級而下自此玄武湖之曲折始得盡見新舊冊庫在湖之中此處最深湖連亘太平神策二門之間環湖村落櫛比土田畦壟方整宛如棋枰自此而西則大江迤邐而東繞出帝都之後逆江而上皆山也江山之險實天造地設傳曰天險不可升也地險山川丘陵也王公設險以守其國設險亦因乎地險汴為四戰之地所以不可都也金陵以江為險

人之所知而用險之道人或未盡知六代南宋雖偏安
即其保守一隅能却敵而制勝如周瑜王導謝安韓世
忠虞允文者亦有用之之道矣自金川北繞獅子山於
內雉堞東西相向亦建二門曰鍾阜儀鳳金陵在春秋
時本吳地越句踐滅吳築城於長干里俗呼越臺楚置
金陵邑於石頭金陵有城邑自此始秦始皇以望氣者
之言鑿方山斷長壠以泄王氣其河源二一出句容華
山一出溧水東廬山合流入方山埭自通濟水門入都

城南經武定鎮淮飲虹三橋西出三山水門治石城以
達於江乃今所名秦淮者也東漢末以秣陵地封孫策
為吳侯至弟權據有江東築石頭城因山為險扼江為
守即今石城門一帶尚其遺趾也改秣陵為建業建安
十三年移丹陽郡治建業遂徙都焉都城在淮水北五
里據覆舟山西倚石頭以為重後帶玄武湖以為固前
柵秦淮以為阻今詳審其地實得面勢之正南五里至
淮水有大航門宮之後有苑城晉所謂臺城即此也赤

烏四年東鑿渠名青溪自城北塹泄玄武湖水九曲西南入秦淮今僅存一曲而已金陵建都實自吳始其故蹟大畧具於此矣

海岱記

王樵

予年十三四時從先君官東萊嘗一至海上泰山雖未登道中先君每指示之初不甚了了及過魯境東方空曠遠愈分明後讀杜詩乃知所謂齊魯青未了者為簡而盡也嘉靖庚申待罪按察又得奉遺軌尋舊遊至以

六月諸僚間相邀泛舟大明湖芙蓉盛開舟行翠蓋間
自謂身在水仙之國渚汜間時有村落志在城市一日
遂放舟出水門至華不注山而止城北古木蒼然清溪
印月一時幽興言不能狀竊謂錢塘西湖不足以過也
華不注為歷下主山諸山環伏此獨孤秀山以遠而妍
此山純石不樹而黛色可挹遠近皆妍趵突泉今為午
道數因送客至焉喬白巖嘗因遊此而起尋源王屋之
興蓋王屋山至高而險流水發源其頂入太乙池而伏

九十里復見為東西兩源所謂東流為沛者也俗傳沛源能出物以應人之求然率於三四月間蓋春夏之交泉脈騰沸而沛尤勁疾物隨沸而上故餘時即否無他神異也再出為趵突泉曾子固謂嘗有葉糠於黑水之灣者而見之於此正與沛源事同然子固謂岱北齊東南諸谷之水匯於黑水柏厓之灣至於渴馬厓下泊然而止潛流地中北至歷城之西復出為趵突泉而不明言其為沛水然歷下發地皆泉實皆沛所過也瀦為大

明湖注為灤水分為大小清河皆沛水也唐李賢謂沛
自鄭以東貫德曹鄆濟青以入於海然則人稱絕於王
莽時非真絕也山東苦溝洫之政不脩儲泄無法故旱
潦無備可耕之處往往棄為蒿萊歲一不登民輒流移
須朝廷加意責成監司守令有以為之處而後可東三
府差勝於西三府然總不如河南也山東人人習武雖
五尺童子亦能射有能脩太公管仲之政他日未必不
如李抱真雄視諸方也臨清南北襟喉山東巡撫宜建

臺於此以鎮之設險以守國道宜然已至審飢之法須編入村落沿門喚集給票注簿示有期日使按期而來不併聚一日然後依次給散則里老吏胥不得作弊而窮民得沾實惠庚申年山東飢巡撫奏准發粟賑貸予以此法行之又設粥於寧陽親往監視同僚多謂其過予謂晦翁在浙東單車却導從窮檐之下無不到故民隱無不知今猶患不能如此豈過耶景王之國道出山東舟大小千艘用夫二萬餘用七道民壯皇筏夫沿河

接遞夫猶不足量派裏縣鄉夫子慮其擾則命鄉夫且
緩派憶昔為行人出使時見夫役有一程接代不至便
嘵嘵有言及與雇錢則連行數程不稱困乏因知沿河
雇募便可取足白於巡撫請盡罷鄉夫巡撫初未以為
然及聞前路鄉夫被王舟人逼索剝奪有投水溺死者
縊者逃者蓋鄉夫頗有衣裝又蠢懦故舟人得肆虐乃
如予前議彼沿河人皆積猾衣縷蓋形不足腰裏三千
棋炒錢十數文舟人無所索王舟自平原至沙河二千

里一用雇募費省而人便半月而出境有司可委托者
多為同僚所占不欲與之爭剩下典史驛丞素署下考
者予因呼而用之至則激之曰汝等自新之機在今日
皆叩首願自效蓋王府人役非此輩不能與之言有以
塞之使之安靖而過不受擾足矣臨清知州為王府人
圍逼至欲自戕王舟夜過某閘束燎不續致問巡撫巡
按安在孟知縣至於被鎖此可見矣汶水自古東北入
海以智力導引使南接淮泗北通白衛實創自元人而

成於我朝二百餘年歲漕四百萬石按期而至南北三千餘里官私一航閱月可達物貨相輸有無相濟故漕河國家之津脈有不通當求所以通之之策若欲舍此而彼求縱曰可濟猶非至計況必不可成如近日膠萊之議乎凡為漕河之患有二曰泉流之微也曰黃河之決也泉流之微起於泉政之失也凡係泉流所在疏導以時沿河水櫃閘堰儲泄有法尺寸之水盡為漕用故以一汶之流濟千里之運而未嘗不足後七十二泉聞

多湮塞儲泄之法悉不如前此可諉曰問諸水濱哉至於黃河決而南北皆有害決而南則徐沛淮揚受其衝而祖陵尤可虞此莫大之患而人猶徂目前之安卒無善後之策決而北方憂其害漕而又憂至於廢漕者繆說也余闕固云人言黃河北恐會通之漕廢吾謂黃河北而會通之漕不廢何則漕以汶而不資於河也此言可謂盡之然河勢若此而衝入會通則閘座皆廢幸而通流則舟行閘面一日數程暫若快意不幸而橫決有

決有塞至於斷流舟楫不通而水櫃閘堰素費工力者皆為所壞修復甚難此則害漕為勢所不免故人言引黃河以濟漕河未嘗不可導之使北何也天地之有四瀆猶人身血脈之有大經絡瀆者獨入於海也今河淮併行河奪淮之道至於泛濫猶人身血紊經絡此豈可謂天地之常也哉河水重濁號為一石水而六斗泥下流少緩上流必淤是以海口積成大沙以河淮併行淮道隘小去不迅疾之故也今海口之沙不可去上流縱

築隄防約攔水勢安能永久無事欲永久無事惟有縱
之使北而已或曰河淮併行幾年於茲矣非不欲使之
北不可北也吾謂不然所謂不可北者若謂利害有不
可則吾前既言之害漕之害孰與祖陵之重智者尚當
權其重輕况河雖北而漕可無害尚有策乎若謂河性
不可使北則尤不通於理不達於河勢矣漢時河有徙
決止在北方去禹故道未嘗相遠漢武帝元光中河決
於瓠子東南注鉅野通於淮泗武帝親臨決河公卿負

薪卒塞瓠子築宮其上名曰宣防而導河北行二渠復
禹舊迹而梁楚之地無水災平帝時大司空掾王橫言
秦攻魏決河灌其都決處遂大不可復補宜徙完平處
使經西山足東北入海是前代定論固惟以復禹舊迹
使東北入海為是矣迨後世不能如武帝遠見決意瓠
子之塞所以多河患孟子曰禹之治水水之道也後世
失其道而南豈河不可使北哉或言禹九河故道在今
滄瀛景德之境密邇神京奈何引河患使近哉吾謂兩

京俱為根本重地以祖陵言則南之害迫而難緩議以地勢言則北之害猶賒而可預圖况太行西繞黃河又來朝拱京東鈐鑰益固豈不有助於神京之壯反謂延患使近哉夫黃河治則不難於修復漕河漕河復則不必復言海運今膠河之議雖罷海運之險尚未有極言其不便而止其議者丘文莊公海外人故專言海運之利彼所謂計損失之少者歲到之米數而不知海中漂溺之事無日不有太倉但責歲到之數無虧而不問其

他有司預有損失之虞安能無倍贏之輸而舟卒民力
元人視為痛痒不知者安嘗一一報之官而書之史乎
以近日徐沛間黃水泛漲之時猶有漂失乃改冬底起
運以避此而况海中乎長運之軍歲無休息復驅之海
情將不堪勢又及民兵民俱困矣借曰募其願者寧有
幾也故閘河必不可棄海運必不可行閘河惟通故南
北貨物交輸官私船隻繹絡兩岼人民輳集兩京津脈
相通所以為國家全盛氣象若行海運則閘河必以無

用而廢閘河以無用而廢則南北貨物官私船舟寧能如前日之通行乎兩岍人民必以無業而去寧復如前日之輳集乎自此浸成蕭條豈國家全盛之氣象乎或又言兼行海運非欲廢漕河也漕河或有遲阻此不至而彼至且因以習知海道不亦可乎此又計之左者也聞太倉已有數年之儲漕河或又遲阻自有轉般之法可行何事而兼行海運幸冀於此不至而彼至乎况自經倭亂以來人心日壞盜賊之變在陸地猶難盡防海

中之事尤不可預料吾恐自此生事而習知海道之人欲為寇備而先以啓寇元人之鑿固未遠也膠萊河者源出高密縣南自膠州分流北至萊州府海倉入海風帆一日夜抵膠入膠河至海倉入海風帆二日夜抵天津通計海洋之中不過六百里耳元人疏濬欲以避東海數千里之險以末運兵梗而止入我朝士大夫以海運有風波之虞漕河或有意外之阻多言可開此以為餽送別道而朝廷未曾試其利害萬厯中用尚書劉公

應節之言試而難成乃罷自是膠萊之議息矣因記於此諺謂此河為銅鑄鐵底難於開濬又難於通津舊議所以為通津之策者有二一曰兩頭海潮一曰中路泉灤今勘河高而海下勢本難通又南潮止及陳村閘距海口二十里北潮止及楊家圈距海口六十里遇風迅潮疾或至朱鋪亭口不可為常且潮水倏忽長落運舟寧無守候耽延況潮之所及有限乎此通潮不足恃也泉灤之說初謂沿海郡縣凡流泉湖灤皆可如漕河引

泉之法以時疏之賴以為膠河之濟一曰沽河源出黃
縣一曰張魯河源出高密鐵櫛山衆水所聚名曰都泊
即公孫弘牧豕處周百餘里中隱二三十泉可濟分水
嶺之艱一曰淮河水勢極大冬夏常流亦名淮河諺曰
膠翁淮母無媒不偶此三者實膠萊河之命脈也今勘
前項河濼最下之地為秋潦所歸十月以後日漸消耗
至春月泉脈微細適糧運湧到之時雖置櫃建閘終不
能使之源源而來此引河不足恃也乘潮引河皆無足

恃又况瀕海之地上多積沙下多礪石沙在海中者潮
水湧進沙必隨之而入沙在地中者畚鍤所及沙必隨
之而出土可蕩盡沙則下沉非挑除所能絕亦非堰閘
所能障也至於礪石人謂錐不能入此又難於挖沙矣
庚申冬與叅政林君登泰山初十餘里皆高岡至回馬
嶺始峻拔車馬不可上坐板輿用伏機可轉數人扛之
二人挽之前者見後人頂後者見前人履底而坐者常
平計三百四十一盤四千三百七十四磴初望高峰刺

天有白雲縹緲其間以為絕頂及到天關又在踝下下
瞰神悚至頂尚十里也時當雪後初晴千山之巔猶白
下視一氣混茫上下一色恍如身坐水晶宮因咏南軒
張先生之詩曰人立千峰秋色裏月生滄海暮雲邊噫
大哉遊乎日觀峰五夜見日出唐人言交州望南極繞
高二十餘度八月望海中望老人星下列星燦然明大
者甚衆乃渾天家以為常沒地中者也以平地見日
出而疑日觀之事正猶未到交州者不見南極下星爾

林君問予孟子小天下之說予曰泰山特起東方青徐
兗豫適旋其趾人目力有窮使有神人立此俯眺八荒
則恒華嵩霍直相拱揖耳太行如几河江如帶皆歷歷
在指顧間林君笑而不語又問天下之山無高於五嶽
者乎予曰以泰山觀之陟而始知其高入而始知其深
竒峰峭壁乃隱乎迴巖複岫之中其勢之來者遠而鬱
盤者厚是以為諸山長雄臣僕後先而子孫環擁匪以
其高也意五嶽皆然不然五嶽之外有他山尊者矣予

因又論古者山川之祀壇而不屋今乃人其形宇其地
又元君縱是仙靈不知於泰山何與使嶽神反若失位
皆不合祀典所當釐正秦漢之君以不遇風雨得上封
成禮為天之殊貺而今齊民雜糅褻瀆已甚亦所當禁
欲行而未暇也自至山東欲恭謁闕里而非職事所經
不得特至明年春始得至焉當別為記尋以謝病歸不
復補茲為闕事矣

登招寶記

沈愷

余吏明州三年至三登招寶招寶臨大海四望浩渺與
天無際海中諸島隱隱如鳧鷖拍浪時時飛聳欲墮日
本琉球諸番異域遐眺亦歷歷可指數誠天地一奇觀
也興極偕二三同志登最高峰頂坐石巖酒酣耳熱仰
天嘆曰其有憑虛欲仙乘風雲而下來者乎乃瀉酒石
上歌紫芝曲欲起黃公與之遊而不可得興盡而返蓋
愷吏茲土民安其拙且承平日久民不知兵戎伍蚤起
日持名籍至衛門報喏歸則偃卧無他事傍海居民亦

往往牧雞豚放葉舟取魚蝦入山採松檜為薪或挾弓
矢獵狐兔為樂山中六七十翁煦煦如小兒狀竟不知
邊境為何如事乃今有不盡然者邊檄報漳民通番舶
取息幣時肆掠憂時者至募民為兵乃帥其人晝夜
警日出鼓鉦日入燎燿至振鐸巡鑿植棘樹墉坎山谷
以守人情洶洶海邦驛騷若朝不謀夕時天久不雨俄
而雲密欲雨風颯颯四起往余見海上人道招寶山頂望
日出海雲生樹石巖屋聽風雨迥異人世客有好事者

勸之一登曰盍往觀乎余曰山海宛然昨也余非前日
之意况矣夫國家恩養軍士若驕子然若有緩急卒不
得其死力其捍患禦難往往出於市井網罟之民果何
為邪果何為邪余為唏噓久之乃望洋而歌曰海水洋
洋兮天為茫茫我心憂傷兮曷為其亡

明文海卷三百五十六